



Dao wo ich gebaore bèn Oetgaaf van Veldeke krènk Zitterd Zitterd-Gelaen-Bor



VELDEKE - ZITTERD

Jaorgank: 28. Nr. 45
Mei 2015

St.Rosa Runj

"In dees oetgaaf"

Verhàölkes en gedichten
gesjreve door:

Leon van Binsbergen
Peter Boudewijn
Luck Brouns
John Hertogh
Rik Jacobs
Thijs Jakobs
Jean Knoors
Marscha Roelofs
Phil Schaecken
Jef Spuiers
Patrick Werdens
Jos Zelis

Foto's: Euregionaal Historisch
Centrum Sittard-Geleen
Patrick Werdens
Jean Knoors
Luck Brouns

Veurzitter:
Jean Knoors
Kastanjestraat 8
6127 EA Grevenbicht
046-485.72.06
j.knoors@kpnplanet.nl

Sikkretariaat:
Patrick Werdens
Chr. Kisselsstraat 3
6131 BV Sittard
Til: 0464587140
p.werdens@gmail.com

Bankraekeningnómmer
Rabobank Zitterd-Gelaen
O.v.v. Vedekekrenk Zitterd
NL85 RABO 0187 6214 54

Lay-Out en samensjtèlling:
Harrie Claessen oet Beeg

Bekans 40 jaor geleeë, in 1977 woort de grote St.Rosa Runj in Zitterd gehawte.

Vruiger waar 't de geweunde óm deilnummesj aan 'ne fitswedsjtried te laote ómkleije bie de luuj thoes. 't Gouf toen nog gein rennesjbösse en ze verdeinde te wenig óm nao ein pensioen of hotel te gaon. Ich woonde doe veuraan oppe Leijebroukerwaeg.


Zo passeierde 't dat 'r aan de paort woort geklop en 'ne sjmale, lankhäärige jóng vroug in ein Gelders dialek of hae zich bie ós urges koosj ómkleije. Ich haw get mitliej mit häöm en leit häöm en ziene fits door de paort en wees 'm de waeg nao ós wirkes. Dao lag ich 'm ouch nog zeip en handjdouk gereid naeve de wesjbak.

Noe wós ich van fitserenne aevevööl es van fierljeppe en ich haw de jóng ouch neit nao ziene naam gevraog. Mer hae sjtélde zich zelf veur es Henk Lubberding en leek get gepi-keierd, wie ich gein teike van herkènnig gouf. Ich dach dat hae zenewechtig veur de runj waar en wunsjde häöm vööl sukses wie hae oppe fits nao de sjtart góng.

Twée en ei hawf oer later koum d'r trök en hae haw de runj gewónne! "Weten jullie nu wie ik ben?", vroug hae nogal pritsj. Hae wesjde zich flot en vertrók zónger danke of daag te zegke.

Miene naober dach dat ich 't "sjoud" waar dat dae Lubberding gewónne haw. Mesjiens haw hae zich geërgerd dat veer häöm neit herkend hawwe. 'n Jaor later wón daezelfde sjpichtige lankhäärige jóng de Touretappe nao Pau!

John Hertogh.



Jeugveurdrach



Op 7 november veurig jaor vonj veur de 59^{ste} maol de platewegaovend veur de Gelaense basissjole plaatsj. Mit 17 optraejes in ein zeer goud gevölde Hanenhof kan me sjpraeke van eine bezónjere aovend.

Dèks hawwe de kènjer hun kleijaasj aan de teks aangepas.

Opvallend waar ouch dat de veurgedrage teks dèks door de awwesj van de kènjer gesjreve waar. Twee veurgedrage teksten van et aafge-

loupe jaor zeen in dit buiskske geplaatstj.

De twee kènjer oppe foto's höbbe hun veurdrachgaof laote heure. Euver ein paar maondj gaon veer weier mit z'n alle nao de Hanenhof.

Oppe 6 november wurt de 60^{ste} platewegaovend gehawte. 't is de bedoeling ouch de Zittersje sjole derbie te betrekke.

Geer heurt bènnekort meer van os.



Jaorprogram 2015

Veur 't veurjaor zeen veer nog ómgang mit ein bezunjert aktiviteit mer de persieze datum is nog neit bekènd. Hawt de daag- en waekblaar in de läöker.

- 21-06 Zittesje Mès in de Basiliek 10.30 oere
- 29-08 Sjtart verkoup Zittesje Sjeurkalender 2016
- 19-09 Nach van 't Limburgs Leid
- 04-10 Wanjeling door Holtum
- 06-11 Sjole Dialekveurdrach in de Hanenhof
- 13-12 Krismiddig
- 15-12 Zittesj Dictee

Zittesje Mes

Op 21 juni 2015 zal de jäärlikse Dialekmès van ós plaatsj vènje en sjus wie de veurgaonde jaore zal dees ouch dit jaor weier gehawte waere in de Basiliek in Zitterd. De mès zal dit jaor in 't teike sjtaon van "Rös in de sjtórnm"; ein thema óm bie veurbaat mesjiens al èns euver nao te dènke.

De zangk in de mès zal verzörg waere door 't koor van de Basiliek ó.l.v. Hanny Pokorny.

Anger jaore zoute de benk in de kirk al gaw vol. Veer adviseiere uch óm op tied in de kirk te zeen. Aanvangk is óm 10.30 oere.



Zittesje Sjeurkalender 2016

Veer zeen al flink ómgang óm ouch veur 2016 weier eine Sjeurkalender oet te brènge. Veur 't kómmend jaor zal deze waal get angesj van opmaak zees es dat geer de aafgeloupe jaore van ós gewènd zeet. Veur de kalender van 2016 kènne veer namelik gebroek make van de teikeninge van Jan Hermans, eine brouwer van Teun Hermans. Hae haet van vööl Zittesje oetdrökkinge en gezègkdes teikeninge gemaak en dees zulle de daag van de waek seiere. De verkouppries zal ouch veur deze kalender 12,50 euro zeen.



Geer kènt inteikene op de Zittesje Sjeurkalender door eine email te sjikke nao veldekezitterd@gmail.com Vermeldj hie in eure naam en adres, wiewööl sjeurkalendesj geer wilt besjtèlle en maak taeves 't versjöldigde bedraag euver op raekening:

NL85 RAB0 0187 621 454 t.n.v. Veldekekrènk Zitterd. Dan zeet geer verzekerd van ein eksemplaar.

Höb geer geine email bel dan na oze secretaris op 4587140, gaef eur inteikening door en maak dan ouch 't versjöldigde bedraag euver.

De prizzentase van de Zittesje Sjeurkalender 2016 zal rón dj St. Rosa plaatsj vènje en vanaaf zaoterdig 29 augustus ligk de Zittesje Sjeurkalender 2015 bie de boukhanjel. De bèsjtèlde Sjeurkalendesj kènne vanaaf 29 augustus opgehaold waere bie boukhanjel Krings oppe Brandjsjtraot.

De Kieper

Elke zoaterdag stoan ich weer op ut veld
Joa in de goal bin ich eine echte held
Duike hiej springe doa
Zoa duit mich dat geine noa

De bel die komme van links en rechts
Ut is jeedere keer weer ein nuuj gevech
Mer ich kin uch verzekere ich haut zedroet
Dat zeat uch verzekere ich haut ze droet
Dat zeat uch deze poet

Ich bin noe mesjien get klein van sjtuk
Mer doarom maak ich mich druk
Geer zult ut zeen ich mich steeds beater
En ich gruij ach elke keer weer eine centimeter

Kieper zeen is mien lus en leave
En ich zal d'r dan ach alles veur geave
Ich zek uch euver teen joar stoan ich aan de top
Want kiepe kin ich waal let mer eins op

Oetgeveurd door: Thijs Jacobs

Gesjreeve door: Rik Jacobs



Veugelke in Canada

(nao ein noodlanjing in Halifax)

Ich zaot in Halifax
te laeze op ein bank
veer wachde op 't vleightuug
sjtilkes
oere, oere lank.

En doe
inèns dat veugelke
vloog zómer bènne rónjdj
't zat zich effe naeve mich
gans kortbie, oppe gróndj.



Klein wunjerke
bezunjerke
klein zunke in de nach
dich haw ich dao in Halifax
doe gaaroets neit verwach.

Doe goufs mich moud
dao wied eweg
doe klein bewaegklik dènk
ich dach neit mee aan noodlanjing
door dich, klein godsgesjènk.

Och
zeen neit alle veugel zo
ein teike in de lóch
van lekker losjes laeve, luuj
geneit, d'r is genóg !

Phil Schaeken

Renoir

Da's de zón, de zomer, 't laeve
da's luchtigheid en leich
vanalles teg'liek.

Eine lach óm de móndj
plezeier, e gegaeve
da's Paries, wo ich ouch mer kiek.

Kleurige kleier, bloumige veljer
positivisme in jeder gezich
Renoir, dae geef wermte, veur wae 't wilt vuile
dat deit hae in jeder geval bie mich.

Phil Schaeken



Aeve Prakkedènke

Veur de vaste laezesj van dees rubriek zal 't effekes wènne zeen, mer veer gaon in dees oetgaaf van Dao Wo Ich Gebaore Bèn eine ziewaeg bewanjele.

In 2014 zeen de lede van de Veldeke krèngk Gelaen bie de krèngk Zitterd gekómme en veer wille ouch waal èns kieke waat zie noe zo weite van hun dialek. In Aeve Prakkedènke kómme dit maol Gelaense weurd aan bod.

Wie gebroekelik sjtaon de antjwoorde achterin DWIGB.

1. Angkoerazjer

- a. Aanmujige
- b. Engstig zeen
- c. Wegloupe

2. Aerbees

- a. Wórm
- b. Vogel
- c. Aardbei

3. Rattekroet

- a. Arcenicum
- b. Ónkroed
- c. Nès ratte

4. 'tSjoot

- a. Bènnepplaatsj
- b. Esj-la
- c. Dujé

5. Ómstebäört

- a. Beurtelings
- b. Ómheure
- c. Gebäörtig

6. Breëm

- a. Dik persoon
- b. Braomesjtroek
- c. Brenne

7. Preem

- a. Wesjpinke
- b. Sjilderie
- c. Breinaoj

8. Batjakker

- a. Beudje
- b. Tennispletsj
- c. Deugneit

9. Waesjdriever

- a. Dwaesjlikger
- b. Wesjmesjen
- c. Verwaand persoon

10. Lósjoare

- a. Drènke
- b. Flapore
- c. Sjael persoon

11. Krapaj

- a. Neutjes
- b. Gesjpuus
- c. Sjmaal

12. Koalef

- a. Mousem
- b. Jóngehóndj
- c. Kleine baer

13. Ambetant

- a. Vervaelend
- b. Ambtelik
- c. Aangetrouwde tant

14. Gróffelsnagel

- a. Kroednagel
- b. Klein naegelke
- c. Grote segaar

15. Biend

- a. Sjtóprandj
- b. Sjlips
- c. Geheuge

16. Glietsje

- a. Bäöke
- b. Geliek wille höbbe
- c. Oetrótsje

Kénjersjpee

Allewiele haet me intressante kénjersjpee wovan de peppelemem neit vööl begrip. Kénjer sjpele mit ein nuujmodisje tillefoon en ammezeiere zich mit de sjoonste musicclip.

Vruiger lank geleje, waar dat gans angesj doe haw veer dat neit ,meh sjpeelde oppe sjtraot. Kénjer zoue dat allewiele ouch waal wille mér dan waere allezelaewe de naoberluuj kaod.

Dat neit allein, ze höbbe gaaroet geine tied eesj hie, dan dao, ein ditje en ein detje. Flot sjpeele ein sjpel, mit Tàblet of zoget saame mit vrunj ,dao geit et in ein wètje.

Zeet geer et óneinser , num effe de tied óm éns röstig wiejer te laeze en voldaan, ein en anger euver vruiger sjpeelkes te heure, die de meiste kénjer van Zitterd höbbe gedaon.

Bie oetpote sjtóng ein paar jónges taenge de moer, et bóksjrenge koosj beginne gaon. Me sjpróng ein nao ein oppe bóks, de lèste klapde, drie maol in de henj en doe waar et sjpel gedaon.

Eine euleteule kraaktuut fispernölle dat deige mit vööl sjpas de zittesje sjnaake. Einsele loute zellefs ein leitje heure van de wies zoue ze neit gaw geraake.

Bie kerbit sjeite waar me gans gesjpant veural mit nuujaor of ein anger fees. Vööl laewe gouf al dat sjeite, mer dat heurde daobie, wie moeze bie kees.

Sjoon waar ouch et kleppere mit kleppesj, twee plenkskes van hout. Wae de sjoonste marsj koosj sjpeele haw gewónne, ein papiere medaaje van goud.


Eine kókkeral van moodesj gaare klöske de sjmik gemaak van sjtek en tou. Lank dreede de kókkeral oppe stjraot vloog 'r door ein roet, sjmeerde veer em gaw.

Oots geheurt van kuulkesjtokke of van muske belle van petsjke werpe, kletsjhenjtje draage of sjtelte loupe. Van metske sjtaeke, sjuumketrèkke of kei werpe landj verouwere, punnikke of verstaekte en neit roupe.

De draak oplaote waar ouch heel sjpannent bleef er in de lóch of veil er oppe Diek. Moosj me hel gaon renne en genóch tou aaflaote sjtóng er aan de heemel, waarste de keuning te riek.

Váól versjil mit noe is der geluif ich neit vandaag den daag is der ouch heel get te belaeve. 't Ligk draan wat geer wilt, aan uch de keus maak uch mer neit te drök en geneit van 't laewe.

Léon van Binsbergen



John Hertogh

Limmerik

in zittert zeen twee gans aw nónne
'ne nuje kedosjop begónne
ze hawwe vääöl moud
mer 't leip neit zo goud
't gouf dao niks angesj wie bónne!

ein jannewarie, hawf twee

't is nog dampetig
de waeg van rood pepier
vuurpiele sjtaon sjeif en
sjtóm in laeg flesje
in de naas de lóch
van waffele, wien en sjnaps
'ne einzame fitser
zjwèjt:
Zelig Nuujjaor

gedanke op 't sjtrandj

ich heurde les twee golve sjpraeke
sjus veurdat die gónge braeke

d'n eesjte reip: 't is gedaon
veer zulle hie te pletter sjlaon
d'n tweede zag: bès mer tevree,
veer zeen gein golve, veer zeen de zee !

sjaele zeiver

euverdrach opgewach belszje vlag
naogedach aezelsdrach nómmer ach

mèsaandach achterwach noots gezag
dómmekrach huwliksnach neit verwach

kirkewach aangelag sjteit op wach
oetgelag klaterlach sjoon gedach

euvermach baerevach gans erg zach
bloumeprach ónverwach sjus bedach

ich höb mich....

zout op ei benkske
zoug waat 'r deig
zónger vääöl muite
zoef: weg sjone fits

ich höb mich dao wiejer
neit drök óm gemaak

keek nao de luuj
koum ein reaksie
kaffe woort kawd
klok sjloug hawf ein

ich höb mich dao wiejer
neit drök óm gemaak

tiedje gezaete
tillefoon reip mich
trök mer nao hoes
toen voul mich in:

wo is miene fits?

sóms

sóms gaon ich mich d'r veur zètte
meistens geit 't van allein
ummer kump 't gans van bènne:
de gedichskes van mien handj.

sóms sjrief ich ze es ich kaod bèn
meistens óm uch get te keutele *
ummer mit gans vääöl plezeier:
de gedichskes van mien handj.

sóms jao sjtaon ze in ei buikske
meistens lees me ze dan waal
ummer sjrief ich ze veur uch luuj:
de gedichskes van mien handj.

*keutele (Zittesj) = kietelen (Holles)

Limeri©k

in d'optochhal dao laefde ein heks
die plekde 't leifste mit Pattex
al klaefde aanein
doe hólp nog allein:
wae haet 'r veur mich nog ein gouw flex?



KLEEBLAEDJES VAN VEIER

ZJWEIKESE

Ich sjtaon mer get te sjpele
en tokkel de gitaar.

Sjnaore laote zich sjtrele.
Mer wurs doe niks gewaar?

*

Och, dao zeen toch zoväöl dóm luuj,
die sjpele gitaar veur dien deur.
Kendj, dat is mer ein raegebuuj.
Ich sjpeel dich zón en zomer veur.

*

Wie eine sjwalber op 'nen draod
zit ich nao dien vinster te kieke.
En kumps doe oppe sjtraot, dan laot
ich zjwierend dich mien leifde blieke.

*

Gael leich van ein sjtraotlantaer
trok eine rènk oppe gróndj.

Wie ich zag: ich zeen dich gaer,
peunde de sjeim diene móndj.

*

Tössje de kleeblaedjes van veier
zoug ich opèns ei reuske sjtaon.
Dat reuske doug mich vääöl plezeiër.
Waat dach geer, dat ich höb gedaon?

*

Dit is den treus in 't laeve,
dat in de Biebel sjteit:
Dae minsj wurd vääöl vergaeve,
dae vääöl oet leifde deit.

*

Zach wie ei bluiend rozeblaedje.
zo zach bès doe van aard.
En al die zachheid, leifste maedje,
höbs doe veur mich bewaard.

*

Aan 't èndj van de daag en de nachte
es den dood mich dwink óm te gaon,
blief ich bie de hemelpaort wachte,
pès doe dao es èngel zuls sjtaon.

JEF SPUISERS.

1953



Es 'n roas op de rots
ligkste taenge d'n heuvelrendj,
es 'n gesjènk Gods
gelag in miensjehendj.

En de hoester in de sjtraote,
róndj de kirk van Sint Denies,
make dich boete maote
tot 'n sjtökske aardsparedies.

Aan dien veut sjtruimp de Gelaen
en van varres löp de Maas.
Doe bès wie "La Belle Hélène"
tösje veljer en graas!

"Wie lang", vraog ich mich aaf,
"blif zoaget nog besjtaon?
Geit wie de Bezenhaof, èns zoa gaaf,
neet alles langzaam nao de maon?"

Lèt dan good op dien heuvels en dale,
gepreze óm hun netuurlikke prach.
Want ze mooiste al graof betale;
óm mergel en kezel verkrach!

Jean Knoors, 21-10-91

p.s. Gelökkig is de Beezenhaof gerestauraared en behawte



Rampzelig!

Euver tweeë maandj (mei/juni 2015) geit 't gebäöre. Dan geit 't "projek Grensmaas" van sjtart in de Maasgemeinten: Zitterd-Gelaen-Bor, Ech-Söstere en Sjtein. 't "Consortium Grensmaas" haet in de vreugere Sjipperskirk oetgebreidj veurlighting gegaeve aan de inwoners van de Maasdörpe mit de bedoeling óm 't werk in gooj hermenie mit de bewoners te laote verloupe. Gein miensj zal zich óndanks die informatie kenne veursjtèlle wie 't Maaslendj van noe zal verangere. 't Geit gans op de sjöp en sjteit geliek mit 'n aerdversjuving van de ergste soort, die v'r noatsj höbbe gekènd en die v'r allein mer kenne oet bergsjtreke van wied-e-weg. Det veurnumme mit de Grensmaas haet mich mieë es dartig jaor geleje al tot óngersjtaonde bedénkinge gebrach. Mer noe geit 't dan toch gebäöre. 'ne Grootere ramp is kaolik te bedénke..!

Kezel

Ze verpeste ós ganse lendj,
grave waterdepe koele,
goaje huip kezel op de kentj
en m'n maog d'r neet euvel moele!

Want 't geit euver hoezer en waeg,
ze neumen't "'t Maaslendjs goud!"
Zoa wurd 't Maaslendj laeg
en nemes zaet " 't is fout!"

Waren't ieës de Limburgse kaole,
wo Neerlendjs ekenemie op dreef.
Noe kómme ze de kezel haole
en make van de wei-je 'n zeef.



Rekrejasie, watersjport en wirkgelaegenheid,
dao gaeve weer ós netuur veur op,
en m'n vundj 't enneuëzelheid,
es m'n reup: " 't is genóg, noe sjtop!"

Es mesjienes neet mieë hunne gangk kenne gaon,
ómdet hie niks mieë te haole is,
zulle ós de traone in de ouge sjtoan
en zal m'n zègke: "M'n haw 't toch mis!"

Jean Knoors
06.04.2015.

Plat Moele

Wat is d'r mis mit òzze Limburgse taal
Vraag ich mich dèkser aaf.
Jòng, dao boave in Den Haag zeen ze hartsjtikke gepaaf

Veer motte van die ABN gaon moele
Hollandse kak zulle ze bedoele

Loester maar nao deze moelejan
Ich weit d'r ach neet alles van

Maar weit geer noch echte Limburgse weurd?
Hubgeer al èns van:
Ein uf (ei), por(prei), zjwarre (verkesvleuj) of baumsjpek
(sjroop) geheurd?

Of kent geer deze nog? Vutsels (kouse), riegsjartele (veters)
of eine Kattekniep (zaklamp)
De oetspraake: oenmoekel (uulskuuke) of Maria ziep?

Sjus! En dat bedoel ich noe,
Woa mot ut mit òs Limburgs nao toe?

En eerlik, missjien is ut neet meer van deze tied,
Maar ABN?....dan rake veer dit cultureel erfgoed toch kwiet

Dat is ach vas wat Rowen Heze mit zien liedje haet bedold
Ut is ein kwestie van geduld,
dat hiël Holland Limburgs.....

Naehhhh! Ich hauwt ut waal besjaaf.....MOELT!

Gesjreve door: Wendy Roelofs

Marscha Roelofs
10 jaor
Groep 7

WAAT ZAES SE ??? DEIL 2

un LOES=Luis.

Hae zit wie ein loes tusje twee naegel= Hij zit in de knel

unne MAELWORM=Meelworm

Ook scheldnaam voor een muldersknecht: Kroep in eine maelzak, kumpse gepoeierd in de hel (verwensing).

unne LENTJWORM= Lintworm.

unne MESKLAEVERT= Meskever.

un MIET=Mijt (stro-of graanmijt).

MEULEVERKSKE=Pissebed.

Het grootste gevaar van ut meuleverkse of pissebed vormt de uitdroging (daar slaat wellicht de terminologie (water)meule en/of pisse op, die beide op vocht duiden.

Het beestje is eigenlijk een ongewervelde geleedpotige. dat zich op natte plekken in onze tuinen en parken schuil houdt, bijv. onder vochtige bloempotten. Ze maken o.m. gebruik van buikademhaling via pleopoden.

unne MULDER= vrouwelijke meikever.

unne PAESJWORTEL= (Paarden)horzel.

Naar verluidt zouden deze een paard kunnen dood steken.

unne PEEPEL= vlinder (van het Latijnse papilio; Frans: Papilion).

De speciesnamen van de diverse ondersoorten vlinders dragen in het Limburgs dialect minder van het Nederlands afijkende benamingen, bijv, Lanjtkartje (landkaartje), Keuniginnepaasje (Koninginnepage) etc.

unne PEERING=Pier, aardworm.

Vermoedelijk verbastering van Paa(r)ling naar de afwijkende voortplantingsmethodiek van de peer(l)ing.

De worm is namelijk hermafrodit en bezit zowel mannelijke als vrouwelijke geslachtsorganen.

Ze zijn dus tweeslachtig en planten zich geslachtelijk voort.

Hae heurt de peeringe neiste in Sebeerie en zuut 't graas wasse=Hij is heel gierig.

Ofschoon buiten het bestek van deze opsomming vallend, lijkt de aal (ouder: eel) een soortgelijk ethymologisch synoniem te kennen: Op de markt en op feesten en partijen noemen we hem allemaal: PALING (=PaaRling ??).

un PRAAM= een daas, paardenvlieg.

Un RUPSJ = rups.

Un SJAOR= witte nachtvlinder, vroeger gebruikt bij het vissen.

un SJLEK= een slak

Hae krup wie ein sjlek om ein appelkitsje= Hij is aan het flikflooiën of iemand stroop om de mond aan het smeren.

unne SJNIEDER= groot insect met glasachtige vleugels; Waterjuffer.

Ook de libelle (zuug: Jonkerjan) wordt wel sijnieder genoemd.

Vermoedelijk naar de sierlijke vliegwijze, waarbij men perfect bochten kan aafsnijne (afsnijden).

un SJPEN=Spin

Sjpennegewaef= spinnenweb.

unne SJPRENGKHAAN= Sprinkhaan.

Unne SJTIELESJIETERT=vliegvanger, ook wel SJPENNEWAEVER genoemd.

Heeft zijn naam te danken aan de gewoonte om insecten in de vlucht te vangen en daarna weer naar zijn observatiepost terug te keren.

un SJTRONTVLEIG= Aasvlieg.

unne SJTRONTJKLAEVERT= Mestkever.

un SJWAOB= een kakkerlak, bakkerstor.

un TEEK= een mijt.

Zoo traoch wie ein teek=erg langzaam.

un TUNKE= Een pikzwarte watertor (zo rond als een tonnetje dus).

un VUURWURMKE- een Glimwormpje.

un WAATERSJPEN= Schaatsersjder, over het water lopend , op een spin gelijkend insect (O, rinkelend, kinkelend waterding met het zwarte kabotske aan).

un WANTJLOES= wandluis

Peter Boudewijn

Broukzittert, september 2014.



Antwoorden Aeve Prakkedènke

1a, 2c, 3a, 4b, 5a, 6b, 7c, 8c, 9a, 10b, 11b, 12a, 13a, 14a, 15b, 16c

Höb geer ein biedraag veur de volgende oetgaaf, sijk dees dan veur 1 Augustus 2015 nao

veldekezitterd@gmail.com